

# PCD u Allianz dal Center?

Commembras e commembers da la PCD han uss l'ultim pled en chapitel

DA MARTIN CABALZAR/FMR

■ **En ina consultaziun da basa che cuzza fin ils 16 d'october pon commembras e commembers da la PCD s'exprimer davart il nov num e la nova strategia da la partida naziunala. Quest dis retschaivan els il messadi e la charta da votar.** Sco quai ch'il parsura da la PCD Svizra *Gerhard Pfister* è s'exprimi vers la FMR ha la PCD Svizra introduci gia avant quatter onns il process da strategia cun la finamira «da dar a la partida dapli dinamica, da communitgar a moda pli chapavla ses messadis a persunas che n'èn betg liadas cun partidas». En il decurs dals ultims quatter onns hajan presidi e suprastanza ensemen cun las partidas chantunales «analisa, discutà, sviluppa, consultà, sbittà e puspè sviluppa da nov, preparà, consultà experts e puspè consultà e consolidà» declera Pfister il lung ed intensiv process che è stà necessari per chattar ina soluziun. Ussa saja ar-

rivà il temp da decider definitivamain en chausa. En ina consultaziun da basa possian commembras e commembers uss decider sch'els vulan acceptar il nov num ed gughegiar in nov resvegli. «Nus vulain restar sin plaun naziunal la forza relevanta en il center politic ed en il medem mument s'avrir per tut las electuras ed electurs che èn persuadids da l'impurtanza da las valurs libertad, solidaritad e responsablad» accentuescha Pfister. Per quest motiv proponia il presidi da la PCD Svizra ils nums «Mitte – Le Centre – Alleanza del Centro – Allianz dal Center» sco alternativa als nums «CVP/PDC/PPD/PCD» che èn vigur dapi 1970.

## Cumbatter la digren ed avrir la partida

La Partida cristiandemocratica è bain la suletta partida guvernamentala che ha pudì mantegnair pli u main sia forza electorala a l'ocasiun da las ultims tshernas naziunales. Tenor Pfister è quai d'attribuir cunzunt al fatg ch'igl è reussi da mo-

bilisar fitg bain l'agen electoral tradiziunal. Malgrà quest grond sforz ha la PCD tuttina pers dal 2019 0,2 perschient, ses potenzial para d'esser exauri. Plinavant n'èsi er betg reussi a la PCD da gudagnar novas electuras e novs electurs. Oriundamain fuvia la PCD fitg ferma en sias regiuns tradiziunales, oz saja quai pervi da la ferma depopulaziun main il cas. En il medem mument na saja betg reussi da persuader la populaziun dals chantuns urbans da las valurs e da la politica da la PCD, constatescha Pfister. «A nus n'èsi betg reussi da far il sigl sur las regiuns tradiziunales or, perquai che nus vegnin anc adina percepids sco partida catolica e religiosa» constatescha Pfister. Per restar er en l'avegnir ina partida guvernamentala e relevanta sin palancau naziunal drovia la partida success en tut ils chantuns.

Retschertgas ed analisas hajan documentà che la partida avessia tuttavia in potenzial da rodund 20 pertschient. Per contonscher quai stoppian ins dentant

esser pronts d'acceptar tshertas midadas, punctuescha Pfister. I dettia numerusas persunas che sustegnan nossas finamiras politicas che din dentant ch'ellas na possian betg eleger la PCD, perquai ch'ellas na sajan «ni catolicas ni spezialmain religiosas». Era en il ravugl da la partida sezza vegnia il «C» chapì ed interpretà a moda differenta, trai Pfister en consideraziun. Cun la midada dal num na vegnian las valurs da la partida betg a sa midar, la partida stoppia dentant s'avrir e sa sviluppar vinavant.

## La forza relevanta dal Center

La PCD veglia restar la forza politica relevanta en il Center che tegnia ensemen la Svizra, s'engaschia cuminaivlamain per soluziuns raschunavlas per dar dumogn a las sfidas futuras da la Svizra, accentuescha Pfister. La cumbinaziun da libertad, solidaritad e responsablad sociala saja l'essenza da la politica dal center. I drovia perquai ina ferma parti-

da burgaisa en il center che fetschia frunt a la polarisaziun cun soluziuns da consens. En il messadi accompagnant per la consultaziun da basa s'expriman dal reminent mintgamai quatter exponents prominents da la PCD pro e contra la decisiun dal presidi.

Sco quai che Pfister punctuescha expressivamain sajan las partidas chantunales e localas libras da decider fin l'onn 2025 sch'ellas veglian surpigliar il nov num da la partida naziunala u salvar vivant lur num tradiziunal. Lur autonomia saja en tutta cas grantida. Parallelmain cun la dumonda dal num vegnan las tractativas per ina cooperaziun cun la PBD cuntinuadas, la decisiun davart ina fusiun pussaivla sin plaun naziunal duai crudar entochen la fin da quest onn. La decisiun da la PCD davart in nov num da la partida naziunala duai dentant succeder independentmain da las contractivas cun la PBD, sincerescha Pfister.